

आकाशवाणी

खबरां जगमोहन शर्मा कोला,

पैहले खास-खास खबरां:-

1. झारखंड च JPSC ते JSSC मेदवारें दे 24 दिनें थमां जारी विरोध-प्रदर्शन दे बाद राज्य सरकार ने JSSC CGL मतेयान 2026 ते JDPL एजेंसी आसेआ लैते गेदे सब्भै प्रतियोगी मतेयान रद्द करी दिते न।
2. अमरीका दे राष्ट्रपति डोनाल्ड ट्रम्प होरें भारत दी मतदाता पंछान-पत्र आहली बवस्था दी सिफ्त करदे होई आखेआ ऐ जे एह अमरीका दी चुना प्रणाली लेई इक आदर्श मॉडल साबत होई सकदा ऐ।
3. भारत अज्ज नमीं दिल्ली च ब्रिक्स देशें दे पर्यावरण मंत्रिण दी 12मीं बैठक दी मेजबानी करोग।
4. भारत दे सेना प्रमुख जनरल धीरज सेठ होरेंगी नेपाल आर्मी दे Honorary जनरल दा रैंक दिता गेआ ऐ।
5. मौसम विभाग ने उत्तराखंड दे गढ़वाल इलाके दे पहाड़ी जिले च जबरदस्त बरखा दा येलो अलर्ट जारी कीता ऐ, जिसलै जे झारखंड लेई अज्ज रेड अलर्ट जारी कीता गेदा ऐ।
6. नमीं दिल्ली च आयोजित BWF बैडमिंटन विश्व चैम्पियनशिप च मर्दे दे इकले-इकले मकाबले दे पैहले दौर च भारत दे आयुष शेट्टी नै मौजूदा चैम्पियन चीन दे शी युची गी हराइयै बड़डा उल्टफेर कीता ऐ।

<><><><><><>

ते हूँन खबरा विस्तार कन्नै:-

<><><><><><>

Jharkhand –Protest

झारखंड च JPSC ते JSSC मेदवारें दे 24 दिनें थमां जारी विरोध-प्रदर्शन दे बाद राज्य सरकार ने JSSC CGL मतेयान 2026 ते JDPL एजेंसी आसेआ लैते गेदे सब्भै प्रतियोगी मतेयान रद्द करी दिते न। मुख् मंत्री हेमंत सोरेन होरें कल संज्ञा मंत्रीमंडल दी विशेश बैठक दे बाद एह ऐलान कीता। राज्य सरकार ने झारखंड लोक सेवा आयोग ते झारखंड कर्मचारी ताल आयोग आसेआ 2014 च लैते गेदे मतेयानें दी बी व्यापक जांच करने दा हुक्म जारी कीता ऐ। छात्र नेता पीयूष कुमार नै आखेआ ऐ कि एह फैसला छड़ी पैहली गैह ऐ ते प्रदर्शनकारियें दी 11मीं थमां 13मीं JPSC परीक्षा ते CBI जांच दी मंग अजें बी बरकरार ऐ। विद्यार्थियें घोषणा कीती ऐ कि ओह बाकी मंगें पर विचार करियै अगगे केह करना ऐ, एहदे बारे फैसला लैगंन।

<><><><><><>

Trump -ECI

अमरीका दे राष्ट्रपति डोनाल्ड ट्रम्प होरें भारत दी मतदाता पंछान-पत्र आहली बवस्था दी सिफ्त करदे होई आखेआ ऐ जे एह अमरीका दी चुना प्रणाली लेई इक आदर्श मॉडल साबत होई सकदा ऐ। ट्रम्प होरें भारत दी चुना बवस्था गी चुनावी सुरक्षा दी इक शानदार मसाल करार दिता ते आखेआ जे भारती चुना आयुक्त ज्ञानेश कुमार कन्नै उन्दी हाल दी मलाटी मती जानकारी आहली रेही। उ'नें आखेआ जे भारती चुना

आयुक्त होरें एह सोआल पुट्टेआ ऐ कि बिजन अपनी जायज पंछान दस्से दे कोई वोट पाने दा अधिकार दा इस्तेमाल कियां करी सकदा ऐ। अपने इक सोशल मीडिया पोस्ट च ट्रम्प होरें आखेआ जे उन्दे इस सोआल दे हवाले कन्नै उ'नें अमरीकी कांग्रेस गी सेफगार्ड अमरीकन वोटर एलिजिबिलिटी आहला “सेव अमेरिका” कनून पास करने लेई आखेआ ऐ।

<><><><><><>

Brics

भारत अज्ज नमीं दिल्ली च ब्रिक्स देशें दे पर्यावरण मंत्रिण दी 12मीं बैठक दी मेजबानी करोग। पर्यावरण जंगलात ते जलवायु परिवर्तन मंत्रालय नै दस्सेआ ऐ जे एह बैठक महत्वपूर्ण सलाह-सूतर, आम सैहमती तगर पुज्जने ते पर्यावरण संरक्षण लेई सहयोग गी मजबूत करने लेई मंच उपलब्ध कराग। बैठक दी अध्यक्षता केन्द्री पर्यावरण मंत्री भूपेन्द्र यादव करने जा'रदे न। बैठका दिण प्राथमिकताएं दे आधार पर एहदे च पर्यावरण दे अनुकूल टिकाऊ जीवन शैली गी बढ़ावा देने, जंगलें च अगग लग्गने आहली घटनाएं गी रोकने ते तुरत प्रतिक्रिया दी बवस्था, कुदरती वसीलें दा सेही इस्तेमाल ते कचरा प्रबंधन लेई नियम बनाने ते पर्यावरण दे पारम्परिक ज्ञान गी सांझा करने बारे सलाह-सूतर कीता जाहग।

<><><><><><>

Army Chief- Nepal

भारत दे सेना प्रमुख जनरल धीरज सेठ होरें'गी नेपाल आर्मी दे Honorary जनरल दा रैंक दिता गेआ ऐ। कल काठमांडू दे शीतल निवास च आयोजित समारोह च राष्ट्रपति

रामचंद्र पौडेल होरें उनें गी एह सम्मान प्रदान कीता। नेपाल दे उपराष्ट्रपति राम सहाय प्रसाद यादव, विदेश मंत्री Shisir Khanal, नेपाल च भारत दे राजदूत नवीन श्रीवास्तव ते नेपाल सेना ते सरकार दे वरिष्ठ अधिकारी इस मौके पर मौजूद हे। जनरल धीरज सेठ नेपाल दे सेना प्रमुख जनरल अशोक राज सिग्देल हुंदे साददे पर ऐतवारें नेपाल पुज्जे हे। Honorary पद प्रदान करने दी एह रिवायत बरे 1950 च शुरू होई ही। एहदे तैहत भारत ते नेपाल इक-दुए दे सेना प्रमुखें गी जनरल दा Honorary रैंक प्रदान करदे न। जनरल धीरज सेठ होरें जनरल सिग्देल हुंदे कन्नै दपकखी सैन्य सरबंध बधाने पर वचार-विमर्श बी कीता। उनें भारतीय दूतावास च राजदूत नवीन श्रीवास्तव हुंदे कन्नै बी मलाटी कीती ते दौनें देसें दे सरबंध होर मजबूत करने पर चर्चा कीती। उनें नेपाल सेना गी भारत दी तरफा सैन्य ते मैडिकल उपकरण बी दिते।



Weather

मौसम विभाग ने उत्तराखंड दे गढ़वाल इलाके दे पहाड़ी जिले च जबरदस्त बरखा दा येलो अलर्ट जारी कीता ऐ, जिसलै जे झारखंड लेई अज्ज रेड अलर्ट जारी कीता ऐ। मैहकमे ने उत्थे 21 अगस्त तगर भारी बरखा दी पेशनगोई कीती दी ऐ। बरखा ते जिमी धस्सने दिएं घटनाएं दे चलदे राज्य दी 97 प्रतिशत सड़कें पर गड़ियें दी आओ-जाई बुरी चाल्ली प्रभावत होई दी ऐ। तोंआई झारखंड लेई बड़ी मती बरखा दा रेड अलर्ट जारी कीते दा ऐ। एहदे इलावा बिहार, छत्तीसगढ़, पूर्वी मध्य प्रदेश, हिमाचल प्रदेश, ओडिशा ते पच्छिम उत्तर प्रदेश च बी अज्ज भारी थमां मती भारी बरखा दे आसार दस्से गेदे न। तोंआई जम्मू-कश्मीर, लद्दाख, उत्तराखंड, पंजाब चंडीगढ़, हरियाणा, दिल्ली, पूर्वी उत्तर प्रदेश, पच्छिम बंगाल, सिक्किम पूर्वोत्तर राज्यें, कराईकल, पुद्दुचेरी,

तमिलनाडू, केरल ते माहे च वीरवार धोडी भारी बरखा दे इमकान दस्से गेदे न, जिसलै जे गुजरात, आंध्र प्रदेश, तेलंगाना, कर्नाटक ते अंदमान निकोबार द्वीप समूह च बरखा दे कन्नो-कन्नी अंधी तूफान दी बी तवक्को दस्सी गेदी ऐ।

<><><><><><>

BWF Badminton

नमीं दिल्ली च आयोजित BWF बैडमिंटन विश्व चैम्पियनशिप च मर्दे दे इकले-इकले मकाबले दे पैहले दौर च भारत दे 21एं बरे दे आयुष शेटी नै मौजूदा चैम्पियन चीन दे शी युची गी 21-14, 13-21, 21-19 कन्नै हराइयै बड्डा उल्टफेर कीता ऐ। पी.वी सिंधु ते महिला डबल्स जोड़ी ट्रीसा जॉली ते गायत्री गोपीचंद बी दुए दौर च पुज्जी गेइयां न। महिला डबल्स च कविप्रिया सेल्वम ते सिमरन सिंधी दी जोड़ी नै स्पेन दी निकोल कैरुला ते कारमेन जिमनेज दी जोड़ी गी 22-20, 21-14 कन्नै हराया। प्रतियोगिता दे दुए रोज अज्ज पुरुष सिंगल्स च लक्ष्य सेन पैहले दौर पर Austria दे कोलिन्स फिलिमोन कन्नै खेड्डन। उन्नति हुडा महिला सिंगल्स दे पैहले दौर च Myanmar दी थेत हतार थुजार कन्नै मकाबला करडन। डबल्स जोड़ी च रोहन कपूर ते रुथविका शिवानी गड्डे ते कनाडा दे जोनाथन लाई ते क्रिस्टल लाई आमने-सामन होगंन। आशीष सूर्या ते अमृता प्रमथेश तुर्की दे एमरे सोनमेज़ और यासेमेन बेक्टास कन्नै मकाबला करडन।

<><><><><><>

Test Cricket IND Vs SL

गॉल च श्रीलंका कन्नै पैहले क्रिकेट टैस्ट च भारत ने पैहली बारी दे आधार पर 178 रन्ज दी बढ़त हासल करी लैती ऐ। भारतीय गेदबाजें मेजबान टीम गी 284 रन्ज पर

आउट करी दिता। भारत ने अपनी पैहली बारी च 462 रन्ज बनाए न। भारती गेंदबाजें च मानव सुथार सब्भनें शा मते कामयाब रेह ते जिनें श्रीलंका दे 4 खडारी आउट कीते, जिसले कि रवीन्दर जडेजा ने त्रै विकेटां हासल कीतियां। देवदत्त पडिक्कल ने सब्भनें शा मते 167, के.एल ने 182 ते ध्रुव जुरेल ने 51 रन्ज दा योगदान दिता। श्रीलंका लेई सोनल दिनुशा ने अपना पैहला टैस्ट शतक बनाया, जिसले कि निरोशन डिकवेला ने 80 रन्ज दा जोगदान दिता। श्रीलंका दे प्रभात जयसूर्या ने भारत दे 4 ते केसरा नुवांता ने त्रै खडारी आउट कीते। अज्ज चौथे ध्याड़े दा खेड्ढ भारती समें मताबक 10 बजे शुरु होग।

<><><><><><>